

Na osnovu Zakona o osiguranju RCG i Statuta Društva, na sjednici Odbora direktora „Swiss osiguranja“ AD Podgorica, dana 11.03. 2011. godine donijeti su sledeći

## USLOVI ZA OSIGURANJE STAKLA OD LOMA

### PREDMET OSIGURANJA

#### Član 1.

- (1) Predmet osiguranja, u smislu ovih uslova, mogu biti:
  - 1) Sve vrste stakla, svjetleći natpisi i reklame; slike, natpisi i ukrasi izrađeni na osiguranim staklima: ploče mermerne i od vještačkog kamena na stolovima, pultovima, regalima i sl; porculanski umivaonici, klozetske šolje i ogledala ulična (za regulisanje saobraćaja), kulturni, istorijski i nadgrobni spomenici od kamena, betona i metala.  
Uz svjetleće natpise i reklame osigurani su i nestakleni djelovi i ramovi koji čine njihov sastavni dio.
  - 2) Neonske i ostale svjetleće cijevi na pripadajućim uređajima i bez njih.
- (2) Ne mogu biti predmet osiguranja:
  - 1) Predmeti od šupljeg stakla, stakla na svjetiljkama i reflektorima, tijela za osvjetljavanja svih vrsta: lampe, cijevi rentgenske, kvarcne, radiotelevizijske i druge, stakla koja se koriste kao oruđa za rad u procesu proizvodnje, sočiva i staklene kugle, zalihe stakla i staklene robe svake vrste.
  - 2) Naprsle i oštećene stvari.
  - 3) Stakla u oštećenim okvirima.
- (3) Osigurane su samo stvari označene u ispravi o osiguranju.

### OSIGURANE OPASNOSTI (RIZICI) I OBAVEZA OSIGURAVAČA

#### Član 2.

- (1) Osiguranjem po ovim uslovima pruža se osiguravajuća zaštita od uništenja ili oštećenja osiguranih stvari zbog ostvarenja bilo koje opasnosti (rizika) kojima su izložene osigurane stvari, osim za štete prouzrokovane:
  - 1) prilikom premještanja ili namještanja osiguranih stvari u prostorijama koje nisu označene u ispravi o osiguranju;
  - 2) ogrebotinom, izjedanjem i sličnim oštećenjima na površini osiguranih stvari;
  - 3) klizanjem ili slijeganjem tla;
  - 4) kod nadgrobnih spomenika prilikom otvaranja i zatvaranja grobnice.
- (2) Ako se to posebno ugovori, osiguravač će biti u obavezi takođe da isplati i naknadu za štetu:
  - 1) na slikama, natpisima i ukrasima, ako je šteta prouzrokovana od istog štetnog događaja, kao i šteta na samoj osiguranoj stvari na kojoj se nalazi slika natpis ili ukras;
  - 2) na stvarima smještenim u izlogu, oštećenim ili uništenim od direktnog udara osiguranih stvari.
- (3) Ako se ugovori osiguranje neon cijevi sa ostalim pripadajućim uređajima, osiguranje pokriva štete uslijed neposrednog dejstva električne energije (kratkog spoja), požara kablova i sl. na nestaklenim djelovima, kao i šteta uslijed: grešaka u konstrukciji livenju i materijalu ukoliko za ove štete nije obavezan isporučilac, i posebnih pogonskih nezgoda, ukoliko ove nisu neposredna posljedica trajnog uticaja hemijskih (korozija, oksidacija), termičkih ili mehaničkih uzroka, istrošenosti, starosti ili lošeg održavanja ili dotrajalosti zbog redovne upotrebe, makar i privremene štete uslijed posebnog dejstva atmosferskog elektriciteta obuhvaćene su osiguranjem samo ako je uređaj pregledan od strane nadležnog organa i primljen kao ispravan.
- (4) Osiguravač je u obavezi takođe da naknadi:
  - 1) troškove za eventualno privremeno najnužnije zastakljenje;
  - 2) troškove za skidanje i ponovno namještanje predmeta koji smetaju pri postavljenju nove stvari (npr. zaštitna rešetka, zaštitna šipka, zaklon od sunca i sl.);
  - 3) Troškove koje osiguranik ima za otklanjanje i smanjenje štete u visini određenoj prema članu 6. ovih Uslova.

### MJESTO OSIGURANJA

#### Član 3.

- (1) Stvari koje se osiguravaju po ovim Uslovima smatraju se osiguranim samo dok se nalaze na mjestu označenom u polisi osiguranja.
- (2) U slučaju proširenja ili promjene mjesta osiguranja posebno se mora ugovoriti da osiguranje važi za prošireno, odnosno novo mjesto osiguranja.

### VRIJEDNOST OSIGURANE STVARI

#### Član 4.

Vrijednost osigurane stvari je nabavna cijena osigurane stvari (stakla, ploče i sl.), odnosno cijena izrade nove slike na staklu, natpisa ili slova od stakla.

### UTVRĐIVANJE NAKNADE IZ OSIGURANJA

#### Član 5.

- (1) Šteta se obračunava prema visini troškova za namještanje novog stakla odnosno druge stvari iste vrste i kvaliteta na mjesto polomljene, odnosno u visini troškova za izradu nove slike, natpisa, ukrasa ili slova od stakla. Eventualno smanjenje vrijednosti oštećene stvari (rabačenje) ne uzima se u obzir.
- (2) Osiguravač može naknadu iz osiguranja izvršiti u novcu ili na taj način što će namjestiti novo staklo odnosno nabaviti stvar (naknada u naturi).  
Ako se naknada vrši u naturi, ostaci prelaze u svojinu osiguravača. U svojinu osiguravača prelazi i staklo upotrebjeno za privremeno zastakljivanje (čl.2. stav (3) tačka 1.)  
Ako se naknada vrši u novcu, osiguranik prema dogovoru može zadržati vrijednost ostatka.
- (3) Šteta obračunata prema prethodnom stavu naknadiće se u punom iznosu, ako suma osiguranja nije manja od vrijednosti osigurane stvari (član 4.).
- (4) Ako je suma osiguranja manja od vrijednosti osigurane stvari u trenutku zaključenja ugovora (*podosiguranje*) onda će se naknada u slučaju eventualne štete isplatiti tako što će se primijeniti načelo proporcije.
- (5) Ako su stvari osigurane na "*prvi rizik*", naknada će se isplatiti u visini nastale štete, a najviše do ugovorene sume na "prvi rizik". Odredbe o podosiguranju neće se primjenjivati kod ovog načina osiguranja.  
Krajnju obavezu osiguravača u toku jednogodišnjeg perioda osiguranja za ukupne štete na stvarima osiguranim na "prvi rizik" čini *dvostruki* iznos ugovorene sume osiguranja. Poslije iscrpljenja dvostrukog iznosa sume osiguranja po osnovu tekućih šteta (više šteta u više štetnih događaja) osiguranik može obnoviti ugovor o osiguranju za preostali period tako što će platiti premiju osiguranja po principu "*pro rata temporis*" do isteka osiguranja po osnovnom ugovoru. Tada je krajnja obaveza osiguravača za ovaj period za ukupne štete *suma osiguranja*.

### NAKNADA TROŠKOVA

#### Član 6.

- (1) Osiguravač naknađuje troškove koje je osiguranik učinio kada je osigurani slučaj nastao, za preduzete mjere radi otklanjanja i smanjenja štete, pa i onda kada te mjere nisu bile uspješne, a u skladu sa zakonom.
- (2) Ukupna naknada, na ime troškova iz prethodnog stava i na ime naknade obračunate premije prema članu 5. ovih Uslova, ne može premašiti sumu osiguranja. Troškovi za otklanjanje i smanjenje štete učinjeni po nalogu osiguravača, kao i troškovi privremenog zastakljenja naknađuju se i onda kada zajedno sa naknadom iz člana 5. premašuju sumu osiguranja.
- (3) U slučaju podosiguranja troškovi za otklanjanje i smanjenje štete naknađuju se u istoj srazmjeri kao i šteta, osim u slučajevima kada su učinjeni po nalogu osiguravača.

### OGRANIČENJE OBAVEZE PO OSNOVU DRUGIH OSIGURANJA

#### Član 7.

Ako je osiguranik zaključio i koje drugo osiguranje, kojim su i stakla osigurana (npr. osiguranje od požara) u slučaju štete, naknada iz osiguranja isplaćuje se po osnovu tog drugog osiguranja. Iz uslova osiguranja stakla, izvršiće se naknada samo onda ako pokriće po tom drugom osiguranju nije bilo dovoljno, i to do iznosa nepokrivenog dijela štete.

### VAŽNOST OPŠTIH USLOVA ZA OSIGURANJE IMOVINE

#### Član 8.

Ukoliko nisu u suprotnosti sa ovim Uslovima, na osiguranja zaključena po ovim Uslovima primjenjuju se Opšti uslovi za osiguranje imovine.